

**Uunga siunnersuut: Illulortiternernut aningaasalersuineq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxx 2020-meersoq**

(Nutaanik inissialiornissamut taarsigassarsiarititat taamaallaat inunnut taarsigassarsiaritinneqartassapput aammalu inuit inissiamut ataatsimut taamaallaat taarsigassarsisinnaallutik)

(Ineqarnermut Attaveqaqatigiinnermullu Naalakkersuisoq)

**Saqqummiussissut**

(Ineqarnermut Attaveqaqatigiinnermullu Naalakkersuisoq)

**Siullermeerineq**

Naalakkersuisut sinnerlugit matumuuna Illulortiternernut aningaasalersuineq pillugu Inatsisartut inatsisaata allanngortinneqarnissaa pillugu Inatsisartut inatsisaannut siunnersuut saqqummiuppara.

Sanatitsisut namminersortut aningaasaliisartullu, nutaanik inissialiornissamut taarsigassarsiaritinneqartunik pisortanit taarsigassarsillutik, inissiat inissiatut attartortittakkatut atornissaat siunertaralugu, inissianik amerlanerusunik sanaartortarnerat ukiumi kingulliunerusuni takussaaleriartuinnarpoq.

Tamanna innuttaasut nammineq inissaminnut aningaasalersuisinnaanissaannut imaluunniit pissarsisinnaanissaannut, taamaaliormikkullu imminnut ineqartissinnaanissaannut, tunngavissiiniarluni ilungersuuteqarnermut naapertuutinngilaq. Illulortiternermut aningaasalersuinermut aaqquissuussineq innuttaasuni sapinngisamik amerlanerpaanut iluaqusiissaaq, taamaalilluni sapinngisamik amerlanerpaat taarsigassarsinissamut aaqquissuussinermik tassannga atuisinnaassallutik. Tamanna tunngavigalugu allannguutissatut siunnersuut saqqummiunneqarpoq.

Siunnersuutigineqarpoq nutaanik inissialiornissamut pisortat taarsigassarsiarititaat siunissami taamaallaat inunnut ataasiakkaanut taarsigassarsiaritinneqarsinnaalissasut. Taamaalilluni siunnersuutigineqarpoq inuit ataasiakkaat nutaanik inissialiornissamut pisortanit taarsigassarsillutik ataatsimik inissiaateqareersut, nutaanik inissialiornissamut pisortanit taarsigassarsiteqqinneqarsinnaassanngitsut imaluunniit nutaanik inissialiornissamut pisortanit taarsigassarsilluni inissialiaareersumik tigusisinnaassanngitsut. Taamaaliormi aaqquissuussinerup sapinngisamik amerlanerpaanit iluaqutigineqarnissaa qulakkeerseqassaaq.

Sanatitsisut namminersortut nutaanik inissialiornissamut taarsigassarsinissamut neriorsuummik sulii pissarsisinnaanissaat, Naalakkersuisut pingaartippaat. Inissialiat nutaat taakkua, atuilerinissamut akuersissutip tunniunneqareernerata kingorna kingusinnerpaamik qaammatit 6-it qaangiunneranni inunnut ataasiakkaanut tunineqarsimassasut, atugassarititaasut tunngavigalugit taarsigassarsititsinissamut neriorsuut tunniunneqassaaq. Qaammatit 6-it taakkua qaangiunneranni, inissianut tunineqarsimannngitsunut taarsigassarsinissamut neriorsuut atorunnaassaaq.

Siunnersuutigineqarpoq taarsigassarsiat pioreersut, piginnittut nikinnissaasa tungaanut atugassarititaasut allanngortinnagit atuutsiinnarneqassasut. Sanatitsisut namminersortut imaluunniit aningaasaliisartut nutaanik inissialiornissamut pisortanit taarsigassarsinissaq pillugu neriorsuummik pissarsereersimasut, arlalinnik nammineq pigisanik inissiaateqartut, allannguuteqanngitsumik inissiat inissiatut attartortittakkatut atorsinnaaginnassavaat. Piginnittut nikinneranni pisortat taarsigassarsiarititaat inunnit ataasiakkaanit nutaanik inissialiornissamut pisortanit taarsigassarsiaqariinngitsunit, taamaallaat tiguneqarsinnaassapput. Taamatullu siunnersuutigineqarpoq nutaanik inissialiornissamut taarsigassarsititsinissamut neriorsuutit ulloq 1. januar 2021 sioqqullugu tunniunneqarsimasut, tassani pisussaaffiliisumik sanaartornermut akigititassanut isumaqatigiissuteqartoqareersimalluni, atugassarititaasut allanngortinnagit atuutsiinnarneqassasut.

Sanatitsisup inissiaq ataaseq arlalilluunniit, nutaanik inissialiornissamut pisortanit taarsigassarsivigineqarsimasut, inunnut ataasiakkaanut aamma pisinnaatitaallutillu pisussaataasunut, nutaamik inissialiornissamut pisortanit taarsigassarsiaqariinngitsunut, tunniussinnaavai.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliaannngortippara.